




# About

✉ Uwni ✉ satanyalin@gmail.com

## 目录

0.1 靈烏賦 - 梅 .....	1
0.2 靈烏賦 - 范 .....	2
0.3 靈烏後賦 - 梅 .....	2

你好☒、吾號鶯鴉 (Uwni☒☒☒)。古有歌云「殘鴉兮飛飛、同去兮同歸。」鶯、回飛也。又單也。無兄弟也。無所依也。鴉、烏 (*corvus corax*) 也。古有鴉經占吉凶、以告于人、南人喜鵲惡鴉、北人反之。



圖像 6 *Corvus, Pexels Ekam Juneja*

### 0.1 靈烏賦 - 梅

烏之為靈者何? 噫! 豈獨是烏也。夫人之靈、大者賢、小者智; 獸之靈、大者麟、小者駒; 蟲之靈、大者龍、小者龜; 鳥之靈、大者鳳、小者烏。賢不時而用、智給給兮為世所趨; 麟不時而出、駒流汗兮擾擾於修途; 龍不時而見、龜七十二鑽兮寧自保其堅軀; 鳳不時而鳴、烏鴉鴉兮招唾罵於邑閭。烏兮、事將兆而獻忠、人反謂爾多凶。凶不本於爾、爾又安能凶? 凶人自凶、爾告之凶、是以為凶。爾之不告兮、凶豈能吉? 告而先知兮、謂凶從爾出。胡不若鳳之時鳴、人不怪兮不驚。龜自神而刳殼、駒負駿而死行、智鶯能而日役、體劬劬兮喪精。烏兮爾靈、吾今語汝、庶或汝聽。結爾舌兮鈐爾喙、爾飲啄兮爾自遂、同翱翔兮八九子、勿噪啼兮勿睥睨、往來城頭無爾累。

## 0.2 靈烏賦 - 范

梅君聖俞作是賦、曾不我鄙、而寄以為好。因勉而和之。庶幾感物之意同歸而殊途矣。

靈烏靈烏、爾之為禽兮。何不高翔而遠翥、何為號呼於人兮。告吉凶而逢怒、方將折爾翅而烹爾軀、徒悔焉而亡路。彼啞啞兮如愬、請臆對而心諭：「我有生兮、秉陰陽之含育；我有質兮、處天地之覆露。長慈母之危巢、託主人之佳樹。斤不我伐、彈不我仆。母之鞠兮孔艱、主之仁兮則安。度春風兮、旣成我以羽翰；眷庭柯兮、欲去君而盤桓。思報之意、厥聲或異。警於未形、恐於未熾。知我者謂吉之先、不知我者謂凶之類。故告之則反災於身、不告之則稔禍於人。主恩或忘、我懷靡臧。雖死而告、為凶之防。亦由桑妖於庭、懼而脩德、俾王之興；雉怪於鼎、懼而脩德、俾王之盛。天聽甚邇、人言曷病。彼希聲之鳳皇、亦見譏於楚狂；彼不世之麒麟、亦見傷於魯人。鳳豈以譏而不靈、麟豈以傷而不仁？故割而可卷、孰為神兵；焚而可變、孰為英瓊。寧鳴而死、不默而生。胡不學太倉之鼠兮、何必仁為、豐食而肥。倉苟竭兮、吾將安歸？又不學荒城之狐兮、何必義為。深穴而威。城苟圯兮、吾將疇依？寧驥子之困於馳驚兮、駑駘泰於芻養。寧鵝雛之饑於雲霄兮、鴟鳶飫乎草莽。君不見仲尼之雲兮、予欲無言。纍纍四方、曾不得而已焉。又不見孟軻之志兮、養其浩然。皇皇三月、曾何敢以休焉。此小者優優、而大者乾乾。我烏也勤於母兮自天、愛於主兮自天；人有言兮是然、人無言兮是然。」

## 0.3 靈烏後賦 - 梅

靈烏、我昔閱爾之忠、告人之凶。遭人唾罵、於時不容。覆巢彈類、驅逐西東。余是時作賦以弔汝、非乘爾困而責爾聰。今也主人悟、彈者去、豐爾食於大倉、置爾巢於高樹。晨雞不鳴、百鳥爭慕。傍睨鳳皇、下窺鵝鷺。爾於此時、徒能縱蒼鷹、逐狡兔、不能啄叛臣之目、伺賊壘之去。而復憎鴻鵠之不親、愛燕雀之來附。既不我德、又反我怒。是猶秦漢之豪俠、遠已不稱、昵已則譽。夫然吾分足而已矣、又焉能顧？